

FILED

MAY 05 2022

mpc
ASSISTANT CLERK OF COURTS
REPUBLIC OF THE MARSHALL ISLANDS

**IN THE TRADITIONAL RIGHTS COURT
OF THE
REPUBLIC OF THE MARSHALL ISLANDS**

JACK JORBON, Riabnono, vs. DIAL AKIRA Rijumae Abnono.	CIVIL ACTION NO. 2020-0329 UAAK IN KAJITOK NAN KAKOBABA
--	--

RO UAAN PANEL EO: Grace Leban
Presiding Judge, TRC

Nixon David
Associate Judge, TRC

Claire T. Loeak
Associate Judge, TRC

Ear itok nan Court in juon Order ilo April 27 raan, 2022 nan an maron lale im uaake juon kajitok letok nan kakobaba iumin uaak eo nan Kajitok 2 jen High Court eo. Court in an Manit ear kadriojlok lomnak im uaak eo an nan kajitok ko ruo letok jen High Court eo ilo Janodre 7 raan, 2022 eo. Botap ilo Bapodre 24 raan, 2022, Riabnono eo ear kadrelon ilo High Court juon an kajitok nan an rooltok case in nan Court in an Manit nan an uaake kakobaba ko ikijen kajitok ko. Rijumae Abnono eo ear kwalok an jab erra ilo kajitok eo an Riabnono eo ilo an kar kadrelon ilo High Court juon an uaak ilo Maaj 7 raan, 2022 im ilo Maaj 16 raan eo, 2022, Riabnono eo ear kadrelon ilo High Court uaak eo an nan Rijumae Abnono eo.

Enin ej kajitok eo jen High Court nan ibben Court in an Manit:


Ikijen uaak eo an TRC nan Kajitok 2, melim eo an Irojiedrik Kelai Nemna im lelok nan Dial Akira bwe en kalok imon jokwe eo an ilo Arkan Weto, Rairok ion aelon in Majuro, Marshall Islands, ejimwe im jejjot ke iumin Mantin Majol ilo an ejelok kojela nan ak melim jen Alap im Senior Dri Jerbal Jack Jorbon, eo im ej jumae melim eo?

Elkin an Panel in kwelok im bok an dron lomnak, ej kabenlok uaak eo an ikijen melim eo lelok, iumin Mantin Majol jen Iroj Kelai Nemna einwot juon Irojedrik, nan an Dial Akira kalek imon jokwe eo an ion Arkan Weto. Melim eo jen Iroj Kelai Nemna nan Dial Akira, im ej alikar jen kein kamol kein an Rijumae Abnono eo, Defendant Exhibit “A” im “B”, im jen naan in kamol ko an, ear jab itok jen konan im akwelap ko an make, ak jen an kar bok kolmenlokjen, karejar im erra ilo jeje ko an Alap im Senior Dri Jerbal rein, ekkar nan jela eo ibben ilo tore eo, Walter Laelang im Arleen Laelang. Wawein in ej bareinwot kalikar lok kolmenlokjen eo an Iroj Kelai ke Arken Weto ej *jurlobdren ne*, im unin an kar kile rein jatin einwot jet ro im rej Alap im Senior Dri Jerbal ilo weto in.


Botap elkin an Court in an Mani kile, bedbed ion Mani, ke Jack Jorbon ej juon eo ejimwe im ekkar bwe en Alap im Senior Dri Jerbal ion Arkan Weto, innem ejimwe bwe jekjek im wawein eo ear bok jikin nan bok kolmenlokjen, karejar im erra ilo jeje ikotaan Iroj Kelai Nemna, Alap Walter Laelang im Senior Dri Jerbal Arleen Laelang nan an Dial Akira maron ekkal ilo Arkan Weto, en bareinwot bok jikin ibben Alap im Senior Dri Jerbal eo rainin, Jack Jorbon.

Enaj kabenlok an wor kitien jimwe im maron, im eddro kein aerro jimor ion Arkan Weto ne erro naaj bok an dron kolmenlokjen, karejar im erra ibben dron ilo jeje im wawein ko jet im rejelet maron kein aerro ion Arkan Weto. Alap eo en lale eddo ko an nan Iroj eo einwot ilo an kile im ekkkan nan e im jerbali tartok in bebe ko jen Iroj eo, im Iroj eo en kile im lale, ilo an kojbarok aeneman im jokane eo an Alap im Dri Jerbal ro an im armij ro droon ion Arkan Weto. Mani in ej kemlet bwe ewor an Alap im Senior Dri Jerbal ro eddo nan Iroj eo einwot an wor an Iroj eo eddo nan Alap im Senior Dri Jerbal eo an, ilo mantin kile, kautej im jela nae dron.


Raan: May 05, 2022.



Grace L. Leban
Presiding Judge, TRC



Nixon David
Associate Judge, TRC



Claire T. Loeak
Associate Judge, TRC